

欽  
定  
全  
唐  
文

欽定全唐文卷八百八十一目錄

新文藝出版社藏書

徐鉉

四

百官奏請行聖尊后冊禮表

賀德音表

謝詔撰元宗實錄表

謝賜莊田表

昭惠皇后謚議

薦處士陳禹狀

爲蕭給事與楚王書

又代蕭給事與楚王書

復方訥書

答左偃處士書

答林正字書

御製春雪詩序

御製春雪詩後序

御製雜說序

北苑侍宴詩序

文獻太子詩集序

翰林學士江簡公集序

蕭庶子詩序

欽定全唐文卷八百八十一

徐鉉四

百官奏請行聖尊后冊禮表

文武百官臣某等言伏奉制旨以聖尊后冊禮奉令旨俟  
百日後上進者仰承嚴命固合遵行但以事有未安理須  
陳奏中謝伏以歷代已來嗣極之主禮之大者尊奉上宮  
倘或正儀未行庶事莫敢先舉所以陛下裁膺冊禮卽下  
制書長樂歸尊已先孝理百司承式將撰吉辰及金輅言  
旋六宮卽敘惟有典禮已屬稽遲遽覩絲言備聽慈旨

苴麻之次誠極感傷然吉凶之儀本無妨礙歷稽前代編  
考儒臣法度具存事體至大況渙汗之澤普及諸侯簡冊  
之行便當相次未修大禮交歡羣情伏乞陛下再稟嚴慈  
俯迴聽允臣等幸列有位庶免曠官冒瀆冕旒無任云云

賀德音表

文武百官某等言伏覩御札崇尚儉約克已庇民節省服  
用去金玉之飾減放嬪御屏聲色之娛供進珍羞制作奇  
巧中禁賜與內門資用竝從損廢以緩征徭宸翰章明德  
音流布凡百卿士至於兆人歡呼感動倍百常品中賀臣

聞文武之政方策存焉知之非艱行之不易故自三代已  
降繼體之君有師保之訓以制其情有諫諍之臣以救其  
失及其行也猶未臻焉豈有發自宸衷出於獨斷乾文昭  
煥至德宏新聳動四方如此之盛者也伏惟陛下重熙撫  
運下武膺期翼翼小心乾乾夕惕寅畏所感人神罔弗和  
仁明所加細大罔弗理然猶勞謙訪道虛已求才日照天  
臨山藏海納體唐堯之仁以親九族極虞舜之孝以奉上  
宮率天下之尊以承顏問安居四海之富以扇枕調膳德  
既充矣化亦孚矣然後卹小民之艱食閔羣吏之急徵息

澤虞之征釋公田之禁崇足用之本近取諸身致九年之  
儲無求於外斥靡曼之色咸遂物情除珍玩之飾率由舊  
典去淫巧以急用罷私積以歸公生人之耳目惟新風俗  
之澆浮立變先皇帝貽翼子之訓垂聖人之資言有所未  
宣行有所未遠陛下奉揚先志推而行之數年之間盛美  
斯備向若非陛下之孝心廣達無以見先帝之聖作惟幾  
巍乎煥乎不可得而名已昔者成湯因歲旱而罪已周成  
動天威而責躬咸能卽致時雍永錫繁祉豈若陛下春秋  
方富中外方寧制於幾先行此難事宗社之降靈可見邦

家之流祚何窮率土之濱孰不幸甚則臣向所謂知之非  
難行之不易陛下既能行之矣臣又聞行之甚易終之實  
難願陛下慎而守之則登三邁五夫何遠耶臣等幸塵班  
列無補明德徒慚充位之譏但賀蒼生之福措詞有盡順  
美難周臣等無任瞻天仰德歡呼躍踴之極云云

謝詔撰元宗實錄表

臣鉉伏奉詔諭以元宗皇帝實錄命臣修撰才微任重恩  
厚責深拜捧絲綸若臨冰谷中謝臣聞握圖御宇既憲章  
於在昔創法垂統亦啟佑於後昆然則至德無名元功無

迹惟日用而不竭豈淺局之能量是以良史之才歷代爲  
重以南董之直而無聞於成編如遷固之能而不絕於浮  
議則知鋪陳王業昭灼皇圖求之當仁豈易輕授伏惟元  
宗皇帝紹中興之統承累洽之基大孝邁於有虞仁恕逾  
於漢祖愛人節用得孝文之風重學崇儒有建元之烈東  
京則光武章明以憂勤立政魏室則太祖陳王以文藻化  
人綜是全功允昭聖德對越上帝敷佑下民二十年間慎  
終如始陛下嗣膺寶歷欽若天明以累聖之資輔生知之  
哲導揚休命啟煥貽謀故得畏軒后之神更延三百配文

王之祀永奉明堂必將著以丹青播於金石斯爲重任宜  
在鴻儒如臣者章句末流記問微學遭逢之便塵玷司言  
豈意天鑒不遺宸慈過聽猥加寵寄及此非才進退莫遑  
怔忡失次然臣祇事先帝常忝近司沐王澤以滋深欽皇  
風而永久報大君之厚德誠有愚心廁作者之清塵其如  
公議戴恩愈極揣分彌驚未識津涯徒知慶躍云云

謝賜莊田表

右臣伏蒙宸慈念及闕乏特降宣旨爲置莊田仍且於少  
府監賜熟米二百石者望外之恩莫知所自撫躬拜命終

懼且驚伏以臣稟性顓愚觸塗疎拙幸緣際會早玷清華  
祿秩之資既爲過量吉凶之備皆沐優恩空費稻粱寧裨  
海嶽但以家傳清白族有羈孤雖欲居常終慚逼下蓋亦  
闇於世務非敢竊效古人伏惟陛下明極燭幽仁深廣覆  
親加寵諭曲軫殊私昔者葛亮薄田不聞君賜孫宏脫粟  
尚獲時譏如臣非才何以致此辭讓則有辜憫惻祇受則  
更覺貪饕徒承推食之恩轉積素餐之懼乾坤之施無可  
上酬螻螻之軀惟知畢命

昭惠皇后謚議

臣聞廣莫極於坤元則含容光大擬議著焉尊莫隆於皇  
后則窈窕思賢詠歌發焉是以上德無名而稱謂流於百  
代至道無象而儀刑表於四方此固天理出於自然聖人  
所以無避者也矧惟節惠之禮百王盛典述德之議史臣  
至公誕昭耿光敢揚懿德伏惟大行國后生商遺烈安劉  
積慶淑質奇相惠問英才光映台華作儷公族紹隆藩閭  
載輯儲闈世子專寢門之禮孝心不置大君以家人之慶  
天覆有加誠由肅雍之德叶此睦婣之盛言內則者以爲  
美談及運屬飛天尊歸配地嚴恭匪懈稟母儀於上宮慈

惠積中率婦道於天下澣濯是服而六衣有煒環佩中節而九御有倫思脫簪之戒以戒憂勤之政躬大練之飾以輔純儉之風陰教既孚王化茂遠方興告變椒風永閔慟結長樂哀纏紫宸龜筮叶從攢塗將啟旌德之號彤管斯存若乃山河表德而文之以禮金玉其相而守之以恭垂訓以慈進賢以哲至於誦經習詩之敏審音知樂之明超然遠識覓絕終古勤行孝養下自從化故寬裕懷於六宮天資明惠學無不通故遺愛鍾於宸眷載稽具美實光前烈謹案謚法德禮不愆容儀恭美皆曰昭慈哲遠識寬裕

遺愛皆曰惠仰惟實錄足表鴻猷謚曰昭惠后謹議

薦處士陳禹狀

右臣伏覩國家哀采羣才搜揚片善有上書言事者猶有可取必加甄錄廣納之意遐邇知恩然臣竊嘗觀之率皆淺近止於采取金寶檢榷賦租製作舟車斬伐材木巡察關禁收捕寇攘旣利害相參亦虛實畧半食祿者眾成務者稀若乃先王教化之源朝廷刑政之本謂之迂濶竟爾寂寥得人之盛未可致也去夏有布衣陳禹詣獻納院上疏獨與眾異其言曰五常之教不立度量之器不均又曰

江鄉之民存不事之以禮沒不祭之於室斯實有意於教化而不汨於流俗者也臣於是訪其爲人則鄉曲無過延之與語則靜默寡詞倘使行顧其言才副其識則古之循吏何以踰之願陛下以親民之職試其爲理考績之際自有常科臣忝預銓司顧慙則哲謬妄論薦俯伏兢惶謹奏

爲蕭給事與楚王書

世事推移長塗睽隔違離軒砌二十餘年追念生平有覲心目伏承大王英謀奮發妙畧宏施長驅伐叛之師克正奪宗之罪奉天朝之正朔慰全楚之謳歌成功上簡於帝

心惠澤遠敷於疲俗風猷所及慶快同深儼早被恩私今  
通信問欣躍之極倍萬常情

又代蕭給事與楚王書

儼聞君子退人忠臣去國舊君有反服之禮交絕無惡聲  
之嫌以義始終今古一也某受性無術闇於事機佩師訓  
以周旋忘時態之險易追惟疇昔受遇先王國士之知何  
嘗暫忘某復曳裾侯館委質府庭松楸所依兄弟少長大  
義若此乃心如何而世事推移讒言交構忠信獲罪干戈  
日尋某雖不才非敢愛死過君以求名則不忍苟生以失

節則不能誠恐叢爾之身終爲執事之累所以仰冒嚴禁  
逃還故鄉出魯國以悲歌向西河而下泣子鮮去衛非欲  
立宗梁鴻適吳本期自質先皇帝恩深善貸義極綏懷采  
鄉曲之棄妻收荆岑之遺璞遂得服勤州縣厯職朝廷始  
望初心豈將及此但封疆夔隔玉帛不尋奕世君臣一朝  
吳越愧三州之父子羨五部之弟兄外覩交朋俯慚章綬  
每春秋代序霜露交零飛江南之羣鴛嘶代北之朔馬悲  
興觸緒淚落霑襟自分沒身長懷永嘆而天將厭亂人或  
與能大王以命世之資克清家難聖上以至仁之舉大濟

橫流車書旣同冠蓋相望方承大王念紉蘭之逐客哀叢  
棘之離人煦以恩光感之意氣乘軒食肉有若平時始聽  
音塵猶疑夢寐且悲且慰五情無主苟非大人之德不以  
細故介懷則惠好所臻孰能若是某又聞善父母者必推  
錫類之感善兄弟者必廣常棣之風故能功冠生民道濟  
天下大王英謀遠畧宏量深仁上國仰其嘉猷全楚被其  
渥澤如某昔年事分曾無薑芥之嫌今日支離合在昭蘇  
之數况東西一體道路無虞倘蒙閔以懸旌全斯大造兄  
弟子姪並許還朝存者荷二天之恩沒者釋九原之恨則

生死骨肉未可比量  
厯膽隳肝寧申萬一  
某以學古爲家業  
以感義爲素懷  
空言虛詞且非說客  
皇天后土實鑒此  
心猶覬拭玉張旃  
或從行人之末捧禽  
執贄重趨典客之  
傍丹懇獲申微願  
斯畢雖復身填溝壑  
猶望魂魄知歸攬  
筆陳詞悲來橫集

復方訥書

鉉以疎拙之性頑滯之資  
廁於人曹無足比數  
然以荷先人之業  
猥踐清貫讀往聖之書  
頗識通方累朝舊恩  
漸於肌骨至於行道  
濟物立身揚名報國  
士之知成天下之務

竊不自揆頗嘗有心故膺耳目之寄當津要之路侃然受  
任不以爲憂而才與心違命與運背言出而不能悟主身  
廢而無足救時三年之中百艱備厯干戈擾於內地烽火  
照於闕庭奔走道路容身靡所當此時也苟得耕於南畝  
齊於一民以斯終焉尚爲幸也而副君將聖王道漸亨博  
採遺賢以濟多難贊諭之任首及非才拜命以來翻自憂  
媿何者儲后踐納麓之重而處於承顏之地有從諫之善  
而立於無過之場徒欲持稊米以實太倉秉燭火以助義  
御恐不足以副上德之舉塞故人之望也但當正身潔已

徇公滅私使內不媿於本心外不違於所學而已閣下德  
我太甚期我太深歷陽郡佐白君至京辱貺手札慶譽優  
渥勗勵殷勤知己之情無以過此然此日副君之垂顧乃  
昔時閣下前席品題之所致也緘藏佩服何日忘之今兵  
難少寧烝民未泰頂踵利物斯實其時閣下高卧已久羣  
望頗鬱宣室之召斯在不遠勉愼興居以副翹企悽悽之  
意遲用面諭不宣再拜

答左僊處士書

月日東海徐鉉答拜稽首復書處士足下鉉讀聖人之書

探作者之意出處語默信非徒然故高卧堯舜之代不爲  
背時濡足楚漢之際不爲趨利嗟乎天下兵起百年於茲  
立功名取富貴者有之貞苦節安徒步者何寂寞而無聞  
也愚常疑廉恥之風於是乎絕而足下負磊落之氣畜清  
麗之才褐衣韋帶賦詩自釋介然之操其殆庶乎悠悠之  
人尚未識其所謂惟韓君叔言知之以鉉愛奇好古者也  
故屢稱足下之行亟誦足下之詩相視欣然以爲今猶古  
也然鉉才名地望遠謝韓君極慮息心不足當隱君子之  
厚顧足下德我太甚惠我好音咫尺之書則古人之道在

其中百篇之詩則作者之序冠其首先以溢美之贈益以謙光之詞發緘欣玩不能自已又念昔之隱者消聲物外絕迹時人今足下高蹈如彼自屈若此得非以吾道久否思發憤而振起之爾鉉誠淺劣不足以堪願契素交歲寒然後盛集續當歸納不宣鉉再拜

答林正字書

十二月日復書正字足下辱貺長牋詞高旨遠循環捧讀欲罷不能見顧之深良足愧也吾子以老成之智蘊救世之心一言悟主俯拾初筮雖位未充量然升聞特達超然

獨異亦古之所難也推是而往其道可知鉉也不才猥廁  
先達雖復識不能見之於未兆才不能濟之於已形然而  
振天下之公議舉天下之公器推轂後進心無適莫庶幾  
不下於昔賢吾子異日當知爲不妄其古今之變安危之  
勢忽乎微哉未可一二以言語盡也謹俟暇日當接餘論  
聊奉還答伏惟鑒悉徐鉉白

御製春雪詩序

臣聞堯尚文思書有永言之目漢崇儒學史稱好道之名  
所以澤及四海化成天下其後迂濶王道蕩淫淳風正始

之音闕而莫續魏帝浮雲之句不接輿詞王融曲水之篇  
無聞聖作將興古義允屬昌期我皇帝陛下常武功成右  
文業廣明踰日月不以聖智自居思挾雲天不以才能格  
物其或南薰有懌東作無憂民思秋稼之娛物茂冬烝之  
禮恩覃在鎬調振橫汾天籟發音疇非聳聽乾文垂象寧  
隔仰瞻信可以暢列聖之謨猷變生人之耳目者也於是  
歲躔作噩序首青陽元鳥司啟之明晨白獸稱觴之節日  
有唐中興之一紀皇上御歷之七年地平天成時和歲稔  
衢樽之味普洽元風擊壤之聲散爲和氣同雲暗野朔雪

飛空急勢隨風影亂東郊之仗凝華接曙光浮元會之筵  
星蹕旣移雲疊乃啟太弟以龍樓之盛入奉垂旒齊王以  
鳳沼之崇來參鑾几霞軒結轍革履齊趨唯陳韶濩之音  
無取魚龍之戲喜油油之旣洽顧奕奕之方呈筆落天波  
言成帝典七言四韻宣示羣臣乃命太弟太傅建勲翰林  
學士給事中朱鞏常夢錫翰林學士中書舍人殷崇義游  
簡言吏部尚書毗陵郡公景運工部尚書上饒郡公景遜  
左常侍勤政殿學士張義方諫議大夫勤政殿學士潘處  
常魏岑駕部員外郎知制誥喬舜主客員外郎知制誥徐

鉉膳部員外郎知制誥張緯光祿卿臨汝郡公景遼鴻臚  
卿文安郡公景遊太府少卿陳畱郡公景道左衛將軍樂  
安郡公宏茂駕部郎中李瞻等或賡元首之歌或和陽春  
之曲如葵心之向日馭似蟄戶之環雷門二十一篇咸從  
奏御皆所以美豐年之兆申萬物之情非徒載笑載言一  
咏一吟而已昔者白雲之唱七萃驅馳黃竹之詩萬人凍  
餒王猷且塞後嗣何觀孰若偃仰大庭優游六藝初筵有  
秩而六官不移夜漏未央而百官已事被之樂府授以史  
官煥乎文章無得而稱也有詔爲序以紀歲月

御批云宿  
來健否酒

醒詩畢可有餘力何妨一  
爲之序以紀歲月呵呵  
徒慙暮入其日內宴臣  
鉉迨後方赴安國作序幸冠首篇狂簡僅成兢  
憂罔措謹上

御製春雪詩後序

昔者漢宮故事著成王負宸之圖魯殿宏規紀黃帝垂衣  
之象用能昭文昭物雖十世而可知如玉如金更百王而  
不易況乎天統建寅之首皇猷累洽之辰上瑞方呈宸游  
載穆拱北極而眾星咸在祝南山而萬壽無踰明皇花萼  
之樓風流不泯德祖中和之節雅頌常垂實奕世之耿光

爲中朝之盛觀固當騰之竹帛飾以丹青襲六藝以同明  
與天文而共麗皇太弟重離普照博望凝思敦古道以致  
君法前經而作事命千秋而指畫召立本以趨馳粲然後  
素之功焯爾彰施之象煦如就日肅不違顏萬國式瞻若  
奉衣裳之會羣臣仰止似聞輿馬之音盛德形容於斯大  
備者也初外朝旣罷內宴方陳赴召者上自副君逮於戚  
里銅壺已晏聖藻爰飛或逡巡而載歌或蹈詠而不作旣  
而有詔出示羣官臣建勲義方鉉等聞命在前援簡先就  
因承中旨入奉斯筵而兩省衆篇翌日咸集故奉和者二

十一首而侍宴者十有四人前序闕遺被令重述謹上、

御製雜說序

臣聞軒后之神也畏愛止乎三百唐虞之聖也倦勤及乎  
耄期文王之明夷也爰象周於六虛宣父之感麟也衰貶  
流於百代乃知功利之及物者與形器而有限道德之垂  
憲者將造物而常新是故體仁者必懇懇於立言務遠者  
必勤勤於宏道然則封泰山告成功七十二家正禮樂刪  
詩書一人而已大矣哉立教之難也有唐基命長發祥符  
舊物重甄斯文不墜皇上高明博厚濬哲文思既承累聖

之資仍就甘盤之學鴻才綺縟理絕名言默識泉深事符  
影響自祇膺眷命欽若重熙廣大孝以厚時風勵惟精而  
勤庶政宥萬民而罪已體百姓以爲心俗富刑清時安歲  
稔其或萬幾暇豫禁籞晏居接對侍臣宵分乃罷討論墳  
典昧旦而興口無擇言手不釋卷嘗從容謂近臣曰卿輩  
從公之暇莫若爲學爲文爲學爲文莫若討論六籍游先  
王之道義不成不失爲古儒也今之爲學所宗者小說所  
尚者刀筆故發言奮藻則在古人之下風以是故也其高  
識遠量又如此焉昔魏武帝有言老而勤學而所著止於

兵書吳大帝亦云學問自益而無聞述作風化之旨彼其  
惡歟屬者國步中艱兵鋒始戢惜民力而屈已畏天命而  
側身靜慮凝神和光戢耀而或深惟遠古遐考萬殊懼時  
運之難并鑑謨猷之可久於是屬思天人之際游心今古  
之間觸緒研幾因文見意縱橫毫翰炳煥縑緗以爲百王  
之季六樂道喪移風易俗之用蕩而無止惛心堙耳之聲  
流而不反故演樂記焉堯舜既往魏晉已還授受非公爭  
奪萌起故論享國延促焉三正不修法弊無救甘心於季  
世之僞絕意於還淳之理故論古今淳薄焉戰國之後右

武賤儒以狙詐爲智能以經藝爲迂濶此風不革世難未  
已故論儒術焉父子恭愛之情君臣去就之分則褒申生  
明荀彧俾死生大義皎然明白推是而往無弗臻皆天地  
之深心聖賢之密意禮樂之極致教化之本源六籍之微  
辭羣疑之互見莫不近如指掌煥若發蒙萬物之動不能  
逃其形百王之變不能異其趣洋洋乎大人之謨訓也夫  
天工不能獨運元后不能獨理故有道無時孟子所以咨  
嗟有君無臣鄭公所以嘆恨庶乎斯民有幸大道將行舉  
而錯之域中則三五之功何遠乎爾臣又聞將順致美鋪

陳耿光布堯言於萬邦稱漢德於殊俗蓋詞臣職也若乃嚮明而理負宸而朝慶賞威刑豫游言動則有太史氏存焉又若雅頌文賦凡三十卷鴻筆麗藻玉振金相則有中書舍人集賢殿學士徐鍇所撰御集序詳矣今立言之作未卽宣行理冠皇墳謙稱雜說臣鉉以密侍禁掖首獲觀瞻有詔冠篇勒成三卷而三卷之中文義旣廣又分上下焉凡一百篇要道備矣將五千而竝久與二曜以同明昭示孫謨永光冊府謹上

北苑侍宴詩序

臣聞通物情而順時令者帝王之能事感惠澤而發頌聲者臣子之自然況乎上國春歸華林雨霽宸游載穆聖藻先飛雷動風行君唱臣和故可告於太史播在薰絃帝典皇墳莫不由斯者已歲躔已巳月屬仲春主上御龍舟游北苑親王舊相至於近臣並儼華纓同參曲宴時也風清景淑物茂人和望蔣嶠之嶽峯祝爲聖壽汎潮溝之清淺流作天波絲簧與擊壤齊聲酸竿共君恩竝醉乃命卽席分題賦詩睿思雲飄天詞綺縟文明所感蹈詠皆同旣擊鉢以爭先亦分題而較勝長景未暮百篇已成自揚大雅

之風豈在道人之職奉詔作序冠於首篇授以集書藏之  
金匱謹上

文獻太子詩集序

鼓天下之動者在乎風通天下之情者存乎言形於風可  
以言者其惟詩乎粵若書契肇生雅頌乃作達朝廷邦國  
之際其用不窮更治亂興替之時其流不竭六義浸遠百  
代可知若夫王公大人居尊履正其行道也無迹其成務  
也不宰所以可則可象有功有親非夫詠言何以觀德周  
文陳王業之什名穆糾宗族之篇聖人輯之皇猷備矣子

桓振建安之藻昭明總著作之英體有古今理無用舍夫  
機神肇於天性感發由於自然被之管絃故音韻不可不  
和形於蹈厲故章句不可不節取譬小而其指大故禽魚  
草木無所遺連類近而及物遠故容貌俯仰無所隱怨惻  
可戒贊美不誣斯實仁者之愛人智士之博物王室光啟  
人文化成上去刪詩綿二千祀其用益廣其制益精絕其  
流冗結以周密王言帝典炳蔚於縑緗詞人才子充溢於  
圖牒若乃簡練調暢則高視前古神氣淳薄則存乎其人  
亦何必於苦調爲高奇以背俗爲雅正者也殿下挺生知

之哲有累聖之資道冠三才學兼百氏虞庠齒胄騰聲於  
就傳之年侯社錫圭底績於爲邦之際隨城封壤人歌召  
伯之棠浙右控臨時賴京師之潤戎機鞅掌曾不勞神閒  
館娛游未嘗釋卷深遠莫窺其際喜愠不見於容唯奮藻  
而搞華則緣情而致意至鍾山樓月登臨牽望闕之懷北  
固江春眺聽極朝宗之思賞物華而頌王澤覽穡事而勸  
農功樂清夜而宴嘉賓感邊塵而憫行役沈吟命筆顧盼  
成章理必造於元微詞必關於教化或寓言而取適終持  
正於攸歸著於簡篇凡若干首及玉符來覲元圃歸尊臨

金史卷一百一十一  
飛閣之華池卽洊雷之講肆斯文間作盛德日新蓋曠代之宗英實一時之師匠以鉉幸塵贊論嘗典絲綸謂可言詩因令視草聽鈞天之奏徒欲動心酌滄海之波唯知滿腹敬抽短翰式繼頌聲謹序

翰林學士江簡公集序

士君子藏器於身應物如響成天下之務者存乎事業通萬物之情者在乎文辭然則日月不知人亡政息瞻之則渺然在羲軒之上蹈之則肅然若旦暮之間自非遺文餘教則作者之道或幾乎息矣嗟乎天地長久英靈超忽艱

中才子與樂事以俱淪江左名臣及元譚而共盡清流可  
揖勝氣猶生閱蠹簡以淒涼撫絕韋而慷慨斯文未喪何  
代無人濟陽江公鍾川岳之粹靈體角犀之奇相芳蘭十  
步本自天資建木千尋非求外獎弱齡聞道夙歲馳名竹  
箭稱美於東南來充王府天馬擅奇於西北入奉乘黃於  
時聖歷中興賢才間出公從容冠蓋之際頡頏臺閣之間  
文高學深識優理勝虛襟接物簡易多通正色當官直方  
無擾定祖宗之大號功補神明端風憲之直繩氣懾姦宄  
身可屈而名不辱用卽行而舍卽藏故叢棘三年雅懷自

若承明再入時望彌高人無間然道亦光矣嗚乎運逢上  
聖年在中身人之云亡空嗟殄瘁死而可作誰與同歸詩  
所謂胡不萬年傳有云古之遺愛者也昔襄陽孟浩然年  
五十有二疾發背而亡公豈其後身歟何符合之若此惟  
公以進士擢第以詞賦馳名事藩邸參管記之司登朝籍  
專掌綸之任奏議表啟時然後言詩筆歌頌和者彌寡絕  
文場而遠驚橫學海以孤飛綜南北之清規盡古今之變  
體優游兩制不亦宜乎然而初無簡編文乃亡逸嗣子翹  
門生王克珍等或搜諸經笥或傳於人口或焚藁之外或

削材之餘彙聚羣分凡得十卷授之執友以命冠篇鉉族  
近情親官聯迹密每西垣景晏北第風清忘形樽俎之間  
得意筌蹄之表西江東海俱爲賦鵬之鄉北門右掖竝對  
受釐之間嗟乎相如既往空存封禪之書季子云來但有  
心期之劍寢門流慟已隔生平都門長送遽成今昔追託  
言於夙契申永悼於斯文援毫悲吒存諸梗槩云耳

蕭庶子詩序

人之所以靈者情也情之所以通者言也其或情之深思  
之遠鬱積乎中不可以言盡者則發爲詩詩之貴於時久

矣雖復觀風之政闕適人之職廢文質異體正變殊塗然而精誠中感靡由於外獎英華挺發必自於天成以此觀其人察其俗思過半矣比夫澤宮選士入國知教其最親切者也是以君子尚之蘭陵蕭君江左之英詩苑之精其爲人也樂易其處世也靜默忘形衡泌之下苦節戎馬之間其道日新其名益震諸侯虛左五府交辟今晉王殿下樹藩作相樂善愛才幕府初開君實首冠由典校書至儀曹郎出入兩宮官無虛授優游多士交必正人每良辰美景登高送遠適莫不存於心府勢利不及於笑談含毫授

簡唱子和汝其性淡故畧淫靡之態其思深故多清苦之  
詞大雅之士何以過此鉉與君爲友幾將二紀其間聚散  
窮達罕或寧居淡成之懷終始若一靜言投分想見古人  
丁巳歲撫王高讓承華出分陝服君以宮省舊德復踐初  
筵撰行之夕俾予視草鉉也不佞無足揚君之美徒欲申  
別恨敘交情故作斯文冠於篇首云爾

欽定全唐文卷八百八十二目錄

徐鉉

五

成氏詩集序

送謝仲宣員外使北蕃序

送贊善大夫陳翊致仕還鄉詩序

送張泌郭賁二先輩序

送武進龔明府之官序

送劉生序

和送鄧王二十六弟牧宣城詩序

游衛氏林亭序

宣州涇縣文宣王新廟記

復三茅禁山記

宣州開元觀重建中三門記

紫極宮新建司命眞君殿記

楞嚴院新作經堂記

攝山棲霞寺新路記

常州義興縣重建長橋記

重修徐孺亭記

喬公亭記

欽定全唐文卷八百八十二

徐鉉

五

成氏詩集序

詩之旨遠矣詩之用大矣先王所以通政教察風俗故有采詩之官陳詩之職物情上達王澤下流及斯道之不行也猶足以吟咏性情黼藻其身非苟而已矣若夫嘉言麗句音韻天成非徒積學所能蓋有神助者也羅君章謝康樂江文通邱希範皆有影響發於夢寐今上谷成君亦有之不然者何其朝捨鷹犬夕味風雅雖世儒積年之勤曾

金史卷之三  
不能及其門者耶逮予之知已盈數百篇矣觀其詩如所  
聞接其人如其詩既賞其能又貴其異故爲冠篇之作以  
示好事者云戊戌歲正月日序

送謝仲宣員外使北蕃序

自昔新都盜國撓我中州建武開元越在江左日月之照  
不及河洛之地者四十年矣主上方恢遠畧宏下武聖作  
物覩有開必先故使僞邦失政胡馬大入山泉反覆羌渾  
沸騰五州遺屯二京故老引領南望庶幾撫予天子聞之  
憫然故命大司馬賈公使以觀變儀曹郎謝君副焉儀曹

別予應曰美哉是行蒼生之福在斯舉矣始予及子同省  
予弟又與子同府交道深矣今子將之絕域無以爲贈請  
贈以言夫格天地充四方莫先乎禮昔我太宗文皇帝革  
暴隋一字內屈已濟物虛心納諫故四夷君長歷代不賓  
稽顙闕下可謂德矣聲明文物垂三百年絕而復續可謂  
禮矣苟使踰百千代之有國家者猶當企聳下風奉行不  
墜況中興之嗣君乎周秦宮闕是本朝二宅貞觀德禮是  
本朝家法若棄之而不念委之而不修非天子之意也主  
上躬行於內而使二君順之於外今強胡入貢中原無生

聖人不能違時時至不可失也子其勉之哉思聖意願人心犬羊百萬以攻戰爲事不可以威武服也酋豪聚首以奸詐爲常不可以智力勝也子其將之以德慎之以禮表冠餘緒必觀光於使臣一覩漢官威儀必感泣頓服宅心南向苟或不爾是絕蒼生之望也可不慎歟鉉自束髮從宦側聞長者之論盛言爲戰國者必以權道子視商周以降誰非戰國寧有以權道躋太平乎而言以人棄故事與願違今子王府元僚居可言之地遠使上介當可行之時勉之哉故人之願蒼生之望在此而已行矣文昌春風二

月征途萬里捨游宴之適就鞍馬之勞征虜亭下南朝送  
別之場臨滄觀側茂宏思洛之所敘離懷古寧無情乎矧  
軺車所經觸緒牽思渡長淮則想清流映月之景過睢園  
則思愁雲零雪之興望輦洛則傷麥秀之詩指唐晉則感  
大風之歌綏懷之暇彈琴咏詩以祛鬱陶之慮還軫在邇  
不復多陳聊敘鄙志爾

送贊善大夫陳翊致仕還鄉詩序

夫進退之機大易稱首止足之誠元文所宗君子動必乘  
時故言行而事立靜惟體道故身貴而名全然則知之非

艱行之不易去聖既遠引年益稀是以古之明君爰有成  
式重辭祿之士優懸車之禮賁飾寵秩靡限常均所以崇  
德尚賢激貪勵俗者也皇風所及我有其人太子洗馬陳  
君翊江浙炳靈鄉閭獲譽棲遲下位而升聞自高便蕃寵  
任而祇畏日積時方多難寄切司聰將命無私臨事能斷  
盤錯必解風雨不渝及少海告符瑤山表慶天下之本旣  
正四郊之壘亦罷於是咏遂初之賦決高謝之懷京口之  
西先有別墅前臨廣陌却枕長江田逾二頃桑都八百戴  
仲若軒懸之地不遠風烟蒲真人鹿迹之鄉依然川域誅

茆築室素欲終焉其所闕者飛泉而已嘗因暇日策杖尋幽爰有道人指示巖溜百步之內一道縣流其清可鑑其味如醴紫崖漱石滌慮蠲疴信山川助其好尚亦心府資其瑩濯旣而挂冠請命伏閤陳辭優詔嘉之竟允其請錫金紫之服升贊善之資輕舟東浮盡室而去副君執手流涕似宜都之別宏景羣公供帳祖餞若都門之送二疏知與不知莫不稱嘆殿下調高雅頌文動星辰賦詩一章以寵行邁掩鄴中之舊制流樂府之新聲足以厚君臣之情敦風化之本縑緗麗色邱壑增華自周行之人與觀光之

士靡然投贈粲爾成章遠比河梁之篇近擬白雲之集夫  
其貞退之節樂善之風實教義之所臻亦咏歌之盛觀也  
鉉名參望苑迹本騷人敢言能賦之才濫奉言詩之賜敬  
序麗則冠於首篇

送張佖郭賁二先輩序

君子所以章灼當時焜耀來裔者必曰進士擢第畿尉釋  
褐斯道也中朝令法雖百王不移者也自聖歷中興百度  
漸貞能興此美者今始見張郭二生矣則知九仞之勢千  
里之行凝雲逐日未可量也鉉也不佞生於先賢之後進

在二子之前此美不兼可以嘆息然有事同而時異請試  
論之噫詞場墮廢五十年矣故老之言議殆絕後生之視  
聽懵然今百辟有司達於郡國吏徒見趨走公府中一尉  
耳焉知其餘哉而二君子調高才逸年少氣盛將以俊造  
之業自重責人以旣廢之禮又將以堯舜之道爲用議政  
於俗吏之間如是將與時大乖矣嗚呼彼眾我寡或者難  
以勝乎君子之道無施不可舒之彌四海卷之在掌握日  
禪見奇於牧馬陽元知名於水碓彼二人卽公輔大器也  
豈以恥辱爲累哉愚願二君子反已正身開懷戢耀無望

人以不知無強人以不能如斯而已矣今天子重文好古  
諸生懷才待用所以蒼生未蒙福者上下之勢殊中有間  
耳大易之義物不終否否極必泰泰之時在上者其道下  
降在下者其道上行君臣相合然後事業遠矣吾以爲斯  
道之復不遠吾子其勉之句曲仙鄉廣陵勝地多難將弭  
春物將華琴瑟詩酒足以爲適贈言之旨盡於斯焉

送武進龔明府之官序

古人有言士君子志意旣立名譽不聞蓋朋友之過也嗚  
呼子於龔生有之矣始子居獻納之地生已爲赤縣尉嘗

竊議謂生宜參諫垣憲府之任而未果拔茅之志遽爲賦  
鵬之行生不旋踵亦左授天長用武之地朝廷置建武軍  
於其所使爲將者治之習兵與儒其志不通也處長與佐  
其勢不鈞也軍市之征日困於民王澤之流不被於俗及  
生之至官聯始舉刪煩革弊丕變舊風踰年告歸舉邑之  
民相率遮道不聽去乃潛匿佛廟室中耆耄輩索而獲焉  
扶之上車擁之而還竟不得已中夜而遁異哉遺愛之風  
若此考功之吏弗聞丙寅歲予避兵於池陽遇生侍親郡  
中勉之東下是時甘泉有烽火之急天子下哀痛之詔予

謂生必自致青雲之上以解天下之倒懸而出入三年始  
爲武進宰噫非朋友之過乎嘗試論之曰才不才在我用  
不用在時道之所存其人乃貴功名寵祿何足算哉苟澤  
及於民教被於物則百里之廣千室之富斯可矣與夫揚  
孟之徒坎壈閭巷垂空言於後世者不猶愈乎行矣龔生  
苟有良田何憂晚歲贈言之要其過此乎

送劉生序

彭城劉生爲南畿今天官侍郎昌黎公作序以送盛稱歷  
陽宰楊員外光儒之爲政以勗之鉉與楊君有姻深知其

內行君清簡仁愛心無適莫自妻子僕妾及家族吏民接  
之無親疎之隔求之於形骸之外蓋真純之氣充而感召  
之應遠民之好競者皆相與言曰眾若囂訟必撓吾員外  
矣嗚呼其古人乎今劉生才俊於楊學優於楊觀其政績  
等然生猶有耿介不平之氣觀吏部之昴子與予之贈言  
蓋爲是也子其平心藏用溜然與道合在古人上矣矧西  
山神仙之宅也旌陽其遠乎僕故倦談生停驂已久故揚  
摧以論之九月二十七日中書舍人徐鉉序

和送鄧王二十六弟牧宣城詩序

夫政成調鼎寄重于蕃蓋欲聖主之恩均於遠邇賢人之  
業浹於中外故所以命丞相鄧王從鑑佩相印被公衮擁  
雙旌統千騎揚帆江寧之浦弭節敬亭之區若乃割友悌  
之懷輟股肱之侍所以示天下之至公也夙駕已嚴前騶  
將引旣辭復召重賜餞筵所以極大君之恩也敦睦之義  
於斯有光申詔侍臣述敘賦詩云爾

游衛氏林亭序

建康西北十里所有迎擔湖水木清華魚鳥翔泳昔晉元  
南渡壺漿交迓於斯今中興建都人烟櫛比於是其間百

畝之地宮率衛君澣沐之所也前有方塘曲沼之勝後有  
鮮原峻嶺之奇表以虛堂累榭飾以怪石珍木悅目之賞  
充物其中待賓之具無求於外庶子王君論德蕭君贊善  
孫君與上臺僚嘗游焉賢衛君也陶陶孟夏杲杲初日虛  
幌始闢清風颯然班荆蔭松琴奕詩酒登降靡迤闕臨駘  
蕩熙熙然不知世與我之爲異矣嗟乎天生萬物貴適其  
性君子有屈身以利物後已而先人或行道以致時交或  
効知以濟世用斯有貴乎自適者也朝市邱壑君得中道  
焉下官道汚智劣無益於事山資弗給歸計未從每尋幽

選勝何遠不居一踐茲境杳然忘歸凡我同遊皆爲智者  
徵文紀事其有意乎壬子歲夏五月祠部郎中知制誥徐  
鉉躊躇慨嘆之所作也

宣州涇縣文宣王新廟記

昔夫子祖述堯舜憲章文武扶東周於已絕拯蒼生於旣  
墜其迹屈而道愈大其人亡而教愈遠則生民以來未之  
有也其在祀典法施於人則祀之矧褒聖之祀其可忽乎  
然則中人不足以語上下士聞道而大笑故斯教也衰於  
戰國廢於嬴秦漢魏以降續而復絕夫仲尼日月重昏千

祀非聖人孰能廓之故斯教也興於武德盛於貞觀極於  
開元理自然也兵興以來大化湮替先王禮器傾頽於勝  
廣之門闕里諸生悽惶於絳灌之下矧厥祠宇其存幾何  
天之愛民不當墜絕皇統再造六藝始修太歲丙午重熙  
在運宣城雄鎮帝之叔父在焉故幕府之選殊重尚書郎  
吳君光輔奉詔佐廉部兼理於涇旣蒞事乃被儒服謁先  
師闢荆榛厯塏垣以造於茅茨之間仰瞻俯觀喟然而歎  
於是奉開元之成制采泮宮之舊章經之營之是卜是度  
維新祕殿嚴飾睟容入室升堂森然如在籩豆有位賓主

由序表著成列門衛肅然於是青衿儒服之子有從師觀  
藝之場鯢齒鮒背之徒識養老慈幼之節欣欣然其化之  
大者歟越明年秋君奏計如京師因得其實嗚呼聖人在  
上羣賢畢舉使三代之風達於邑里不其偉哉余承君之  
歡美君之志刊石紀事實於祠庭後之君子無忘跋及其  
餘理畝籍察庶獄闢污萊過陂塘則有考功之吏在故不  
書於時太歲丁未冬十月九日尚書主客員外郎知制誥  
徐鉉記

復三茅禁山記

華陽洞天金陵福地羣仙之所都會景福之所興作故其  
壇館之盛薦享之殷修奉之嚴樵牧之禁冠於天下其所  
由來舊矣聖厯中微官失其守望拜之地多所荒蕪若乃  
眞靈翔集元貺肸蠭興復之迹必假異人天祐丁丑歲貞  
素先生王君棲霞始來此山恭佩上法徘徊地肺偃息朱  
陽永懷舊規期在必復先生潛德內映符彩外融名士通  
人道契冥會凡縞紵之贈晚信之資悉奉山門以成夙志  
於是由良常洞至雷平山十里而近入於萌隸者盡購贖  
之芻蕘不得輒至墟墓不得雜處蓺樹蔽野植松爲門川

梁必通榛穢必翦建方壇於雷平之上造高亭於良常之  
前朝修有致誠之地游居有稅駕之所姜巴古陌秦望舊  
封肅然清光復如開元天寶之歲矣先是紫陽之右有靈  
寶院焉眞臺故基鞠爲茂草先生殫罄資用克構殿堂有  
闕必先無遠弗屆都督武陵康王奉錢百萬梁王造殿一  
區向道之徒咸助厥事曾未周歲惟新厥宮皆先生之力  
也昔大隗致襄城之駕庚桑化畏壘之人是知道心惟微  
其應如響時則有若道士經若虛協規同志是攝是贊幹  
事以恪感物以誠績用不愆斯實攸賴先生以保大壬子

歲夏四月悉書夫屋之數疆畔所經請命於京師申禁於郡縣以授茅山都監鄧君機一能事既畢數日而化期命元應昧者不知夫仙階感召諒非一揆若乃神清氣靈骨籙標映受之於天也心虛氣沖元德充蔚基之於性也昭真垂教啟煥靈跡行之於勤也故策名紫素飛步黃庭流功儲慶必參相合然則先生之道其殆庶乎雖歛駕不留冥升日遠而高風可述遺範在人進而紀之翰墨之職也鄧君企慕前躅見託直書已未歲秋八月日記

宣州開元觀重建中三門記

夫清淨元默道之基也官館壇墀道之階也生知者因基以成構勤行者升階而覩奧故君子德業元挺仁慈積中必廣馴致之方乃形兼愛之迹爲科誠以檢其情性爲象設以致其誠明情性平則和氣來誠明通則靈符集由是登正眞之境入希夷之域曠矣無際薰然太和斯實興化致理之方還淳反樸之本豈與夫延方士尚祕祝求長生以自奉者同年而語哉宣州開元觀遠擬清虛獨標形勝敬峯崇峻鎮其後句谿澄澈經其陽鍾一方淳粹之精結三素氤氲之氣當泰陵之尊道揭聖厯於華題藹爾殊庭

居爲福地及運纏百六數偶三災雖棟宇不移而制度多闕靈蹤必復有待而興主上嗣位之七年皇室再造之一紀今儲后徇臧札之操讓德承華體間平之賢總戎藩服首台司而握師律鎮京口而領宣城其爲政也質以先正諮於耆老義以果斷仁以發生民力不偷闕政咸舉而斯觀路門久廢遺址將蕪非所以敬教尊祖會昌建福者也乃命執事卽從經度民多暇日府有羨財勤而不勞成而勿亟巨棟山立層簷翼舒六扉洞開方軌並入重廊助其迴合祕殿表其深嚴十絕之幡拂文楣而絢彩九龍之驂

軋金鋪而振響瞻之者有凌雲之氣經之者疑駕歟之游  
信足以勵上士之進修福蒼生之仁壽旣而功宣納麓望  
集撫軍大壯之制斯成重離之位亦正貞符允塞盛德宜  
書道士孫洞虛素業淳深至誠敦懇發揚真迹啟迪嘉猷  
永爲不朽之功願紀它山之石宮臣執筆以謹歲時戊午  
秋九月庚申記

紫極宮新建司命真君殿記

夫金闕琳房不可階而升也惟至誠能通之靈符景福不  
可企而望也惟至行能致之故君子行道於時宣力於國

敷惠於民貽範於家此人之極致自天所祐也又況考集  
靈之地崇列真之宇薦納約之信勵勤行之誠然則希夷  
眇邈超言象之表矣有若故司空相國馮翊懿公承世功  
之緒襲重侯之業地親於副馬美繼於緇衣便蕃臺閣夷  
險一心中立不倚金石貫其心唯力是視風霜盡其節故  
四綜會府再踐中樞三殿方鎮一平邦土慎終如始沒有  
遺忠激楚之樂雖窮通德之門不改嗣子太僕少卿俊等  
祇奉慈訓弗敢失墜以爲公之純誠沖氣本道家者流而  
仁政令典近浹於三茅之境高齋甲第夙鄰乎元元之宮

故棲神植福必先於是爾其治城峻址西州舊署忠貞公之遺隴郭文舉之故臺九原可作盛氣如在乃相形勢補廢闕建司命真君之殿於宮之艮維披真蘊以立程集國工而考藝瞻星揆日不勞而成崇高壯麗重深藻繪煥如也凝旒端簡負斧仍几穆如也珠璫絳節紛披乎左右空歌洞章蕭寥乎晨暮真聖以之而臨御純嘏以之而蕃錫賢人有後孝子奉先無以加於此矣鉉始以事分通舊從子弟之游終以禁掖具員陪僚屬之末及公之啟手足也復忝國士之許辱寄託之任知己之厚何日而忘短篇敘

事蓋感遇之萬一也

楞嚴院新作經堂記

君子才足以治劇惠足以安民見危致命以死勤事有一於此然後可以薦信於無方之神儲慶於必大之門噫楞嚴院經堂之作也其庶幾乎平陽柴君諱進思字昌美故太尉中書令尋陽靖王之孫也少而爽俊長而忠慤尤善騎射頗曉兵書靖王愛之出則典親兵居則專家政幹蠱之美宗族稱之王薨始爲公臣累遷旅帥鴻圖再造金革寢威上以其才能可任故以爲內宴副使乘輅建節將命

四方盤根錯節所至皆治改鄂岳觀察巡官知永興縣事  
縣有山澤之征權管之利歲終考績倍於前人遷泰州軍  
事判官兼營田鹽監平蠹政決庶獄勞農督課潔已律人  
民不告疲公有餘利除勸農使復監池吉二郡護武昌軍  
千里又安上流靜謐會梁人入寇我武未揚東畿陷沒羣  
情震駭命君爲行營應援軍使率舟師數千鼓行而東平  
難濟口復海陵郡於是淮泗之地聲勢始通乘勝長驅因  
迫隋苑前茅接戰羣帥後期振臂奮身有死無二雖破竹  
之勢敗於垂成而東道清夷本由君之一舉也江都克復

歸葬京師天子憫焉贈左千牛衛將軍賻贈加等禮也嗣子殿前承旨廷遇等棘心在疚荼蓼倍兼以爲苴麻苦由飾哀之期有終烝嘗封樹追遠之禮有數復欲圖不朽之績徼無邊之福則金仙之教世之所崇宗旨在於經文威容存乎像設於是擇奇勝之地補闕遺之事構經堂六間塑地藏菩薩像一軀几席什器之類華而備精而固耽然其質煥乎其章深嚴足以遠世喧虛明足以味元旨其全節之風也如彼其集靈之所也如此然則冥冥之祐綿綿之慶豈誣也哉余頃歲左官海陵君盡傾蓋之分感忠臣

之事主嘉孝子之奉親刻石紀事以聳善也援筆悽愴無心於文係大丁巳歲春三月日東海徐鉉記

攝山棲霞寺新路記

棲霞寺山水勝絕景象瓌奇明徵君故宅在焉江令公舊碑詳矣高宗大帝刊聖藻於貞石紆宸翰於璿題煥乎天光被此幽谷先是茲山之距都也五十里而遙方軌並驅崇朝可至及中原構亂多壘在郊野無牧馬之童岐有亡羊之僕義祖武皇帝潛龍茲邑訪道來游始命有司是作新路金椎旣隱玉軼言還桐山之駕不追回中之道亦廢

嗚乎聖人遺跡必將不泯微禹之歎夫何逮哉保大辛亥  
歲時安歲豐政簡民暇粵有寺僧道嚴名高白足勤思利  
人百姓莊思悰家擅素風積而能散嗟亭候之不復憫行  
旅之多艱乃相與翦荆榛疏坎窞闢通衢之夷直棄邪徑  
之迂迴建高亭於道周跨重橋於川上鑿甘井以救渴立  
名表以指迷草樹風烟依依四望峯巒臺榭肅肅前瞻由  
是江乘之塗復識王畿之制矣余職事多暇屢游此山喜  
直道之攸遵嘉二叟之不懈爲文刻石用紀成功俾後之  
好事者以時開通隨壞完葺此碣有泐斯文未湮不亦美

乎其年八月一日兵部員外郎知制誥徐鉉記

常州義興縣重建長橋記

聖人作川梁以濟不通舟車所及纜連綦布若乃形勝傑  
大名聞天下者亦無幾何陽羨長橋其一也夫英賢之所  
躋次邑居之所瞻望山川之精粹宅焉里城之神靈憑焉  
廢而興之圯而葺之豈惟備政足以徼福是橋也徵諸圖  
牒則後漢邑令袁君創造國朝永泰中令邱君新之其他  
無聞焉中興之初邑有義夫曰吳濛吳湏率以私帑備加  
營構人賴其利踰三十載丙辰歲國步中梗百越寇邊邑

人敗之燒營而遁飛炤旁及宏梁半摧甲寅歲著作佐郎  
劉君來爲邑長視其制度知非民力之所能濟乃狀其事  
白於有司上聞嘉之詔賜錢八十萬君信而好古寬而得  
眾尉盧蒨鼎甲餘慶俊造策名政是以和事無不舉乃相  
與敷王澤因民心備物致用程工揆日器利工善材良事  
時戊辰歲冬而裁明年暮春而畢長五十步廣七步對縣  
樓而直出跨荆谿而橫絕丹雘其飾宛偃蹇而虹舒崇高  
其勢邈苕亭而山立朱輪方軌駟馬連騎營營市井憧憧  
往來有衽席之安無揭厲之患昔者乘車濟涉聖人謂之

無教橋梁弗修賢相知其不能以今方古勝負分矣夫書  
云考績傳載稱伐庸庸善善其可廢乎刻之貞珉以示來  
者庚午歲春二月十五日記

重修徐孺亭記

至矣哉天之愛民甚矣雖數有治亂而常生聖賢故得其  
位則功加於時舛其運則教垂於後雖銷聲滅迹全身遠  
害不德而德普逃名而名揚擁篲築宮禮重於列國式閭  
表墓道光於無窮舉善而教政之大者也恭維我祖炳靈  
南國舊宅界乎仙館高臺峙乎澄陂孺亭之稱海內瞻仰

名公良牧代加崇飾千載之下猶旦暮焉頃屬邦君非才  
敗我王度翦焉層構鞠爲茂草噫百世之祀誰能廢之庚  
申歲始建王都辛酉歲遂遷清蹕肆覲羣后疇咨先賢餘  
基未傾偉人將至旣而鼎湖在御桐圭錫壤丞相司空鄧  
王以茂親之重膺分陝之權思老成之典型仰高山之景  
行不言而信不肅而嚴乃命經營將從締構九成方起百  
堵未周甲子歲入秉國鈞以武昌連帥侍中濟南公代司  
宮籥公致用以武從政以文祇奉蕭規率由周禮再廢成  
制詳考舊基夷坎窞而就平裨崖岸而增固乃崇堂奧乃

金  
卷之二十一  
加藻續右巖罇坵之序左設庖膳之區前臨康莊旁眺城  
闕平湖千畝凝碧於其下西山萬疊倒影於其中依然懸  
榻之場想見致芻之狀與夫洪崖之館絢綵於烟霞滕王  
之閣騫飛於雉堞南州之物象備矣前哲之光靈萃焉嗟  
乎君子興一役建一事於時必可頌於後必可觀茲亭之  
作也鄙人朋悅過賓矚目紀於方國之史播於樂職之詩  
鉉也幸承燕翼之謀獲參翰墨之任俾垂不朽敢憚蕪音

喬公亭記

同安城北有雙溪禪院焉皖水經其南求塘出其左前瞻

城邑則萬井纏連却眺平陸則三峯積翠朱橋偃蹇倒影  
於清流巨木輪囷交蔭於別島其地豐潤故植之者茂遂  
其氣清粹故宅之者英秀聞諸耆耄喬公之舊居也雖年  
世屢遷而風流不泯故有方外之士爰構經行之室回廊  
重宇耽若深巖水瀕最勝猶鞠茂草甲寅歲前吏部郎中  
鍾君某字某左官茲郡來游此谿顧瞻徘徊有懷創造審  
曲面勢經之營之院主僧自新輩應善言允符夙契卽日  
而栽逾月而畢不奢不陋旣幽旣閒馮軒俯盼盡濠梁之  
樂開牖長矚忘漢陰之機川原之景象咸歸卉木之光華

一變每冠蓋萃止壺觴畢陳吟嘯發其和琴瑟助其適郡人瞻望飄若神仙署曰喬公之亭志古也噫士君子達則兼濟天下窮則獨善其身未若進退以道小大必理行有餘力與人同樂爲今之懿也是郡也有汝南周公以爲守有潁川鍾君以爲佐故人多暇豫歲比順成旁郡行再雩之禮而我盛選勝之會鄰境興閭戶之嘆而我賦考室之詩播之毗頌其無愧乎余向自禁掖再從放逐故人胥會山水窮游良辰美景賞心樂事有一於此宜其識之立石刊文以示來者於時歲次乙卯保大十三年三月日東海

徐鉉記